

Bertsolari



Txapelketa Nagusia 93

BERTSOZALEAREN TXOKOA

ANDONI AIZPURUA

ETBko kazetaria



EDURNE KOCH

AITOR UGALE / ZUMARRAGA

■ Zein da Zumarragako saio honi buruz duzun iritzia?

■ Nire ustez nahiko saio kaskarra izan da, bertso onak izan dira baino orokorrean nahiko kaskarra. Beharbada gazte dexente zegoelako eta gazteek, nerbioak jota edo, ez dutelako maila eman.

■ Epaimahaiak hartutako erabakiarekin konforme geratu al zara?

■ Euzkitzerena nahiko garbi zegoela uste dut eta gero bigarrenetik laugarrenera ez nuen garbi ikusten zein izango ziren. Beno, Telleria espero bezala ez dela aritu bai, ni ere konturatu naiz potoren bat egin duela eta ez dela batere zentratuta ibili. Baina egia esan Sasiain zortzigarren izatea, niri behintzat, ez zait batere ondo iruditu.

■ Txapelketa jarraitzen ari zara?

■ Bai, jarraitu bai. Gaurkoa izan da ikusi dudana lehen zuzeneko saioa, baina bai, jarraitu dut. Gainera, Murua lehengusu txikia dut eta Gernikan saio on hura egin zuenetik gehixeago oraindik. Finalera ere joango naiz.

■ Noiztik zara zu bertsozale?

■ Gure aitonen aldetik beti entzun izan ditugu bertsoak etxean, eta baita abestu ere. Gero Gabirian bertan, nik uste dut bertso ohitura handia dagoela, urtero festak bertso saio batekin hasten ditugu, gainera bertsolari gazteen txapelketa ere egiten da.

■ Eta bertsoak botatzen al dituzu?

■ Bai, dexentetan, gehienbat afari on baten ondoren, sagardotegietako giro horretan eta koadrilako festa giro horretan aritzen naiz bertsoan. Askotan kotxean bakarka noala ere jartzen naiz horretara.

■ Faboritorik ba al daukazu aurtengo Txapelketa irabazteko?

■ Murua oso ondo dabil aurren eta faboritoen artean bera jarriko nuke nik, bihotzez behintzat. Txapelketatik kanpo, beharbada, Peñagarikanoren freskotasuna asko eskertzen dut. Faborito bat jartzen ez naiz ausartzen, hor badaude bost edo sei oso batera eta edozeinek irabaz dezake.



Erraztasun handiz nagusitu zen Euzkitze Zumarragako saioan. E.KOCH

rririk plazaratzeko asmorik badaukazu?

EUZKITZE.— Bai, baliteke. Besteren bat ere badaukat eta baliteke. Ikusiko da.

EGUNKARIA.— Gaurko gaiak zer iruditu zaizkizu?

EUZKITZE.— Oso onak. Oro har oso onak iruditu zaizkit eta gai jartzen aritu den taldeari zorionak eman nahi nizkioke.

EGUNKARIA.— Aurrera begira

zer asmo izango duzu?

EUZKITZE.— Pausoz pauso joan beharra dago. Lehen esan dut irudimenez Urolako tren zahar hartan sartu nahi nukeela eta Eibartik zehar, Bilbotik barna, Belodromora deskarritatu gabe iritsi. Lehen helburua behintzat hori litzateke, finalera iristea gehiegi sufritu gabe eta behin hara iritsiko banintz, ba beno, arriskatzeko prest egongo nintzateke.

«Berehala ohartu naiz egun samurra nuela»

Euzkitze erraz nagusitu zen Zumarragan

Lan bikaina egin gabe, azkar antzeman zion Xabier Euzkitzek final-aurrekoetarako txartela erraz lor zezakeela. Olaso, Telleria, Loidisaletxe hirukoteak bere maila eman ez zuelako neurri handi batean. Berak espero ez bazuen ere, final-aurrekoetarako txartel zuzena lortu zuen Aritz Lopategik, saio txukuna egin ondoren.

I.ELLAKURIAGA / ZUMARRAGA

Zailtasun handirik gabe nagusitu zen Euzkitze igandean Zumarragan egin zen saioan. Sailkapena poltsikoan seguru ikusten bazuen ere, doinu berri bat atera nahi izan zuen kartzelako gaian. Joseba Tapiak egindako doinu polita kaleratu zuen eta berarekin arratsaldeko bertso onenak bota ere bai. Oraindik beste bat atera dezakeela ere iragarri zigun.

EGUNKARIA.— Zer iritzi duzu orokorrean Zumarragako saioaz?

XABIER EUZKITZE.— Ez dut uste oso maila onekoa ere izan denik, batipat berez puntan ibili beharko luketen batzuk ez direlako ibili. Olasok ez du bererik eman, Telleriak ere ez, ezta Loidisaletxe ere.

EGUNKARIA.— Nola ikusi duzu zeure burua saioan zehar?

EUZKITZE.— Hasieran batere kontzentrazioa gabe hasi naiz lanean, lehenbizi zortziko handian jarri digun gaia ere ez dut behar bezala entzun, baina berehalaxe konturatu naiz egun samur samarra nuela eta ez nuela arazo handirik izango. Neure burua nahiko sueto ikusi dut.

EGUNKARIA.— Kartzelako gaian zerbait arriskatu duzu?

EUZKITZE.— Ez, zenbaitek pentsatuko du behar handiegirik gabe hasi naizela florituran. Dena den, banuen gogo doinu hau plazaratzeko, Joseba Tapiak egindako doinua da eta neure burua sueto eta konfiantzaz ikusi dudanez, pentsatu dut 'ba, beharrik ez daukat baina, ba, aurrera'.

EGUNKARIA.— Gaur doinu berri bat erabili duzu. Beste doinu be-

Puntuen arabera azkena sailkatu den Juan Mari Lopezengandik puntu bakar batera geratu da. «Azkenean horixe da pena, puntu bakar batengatik final-aurrekoetatik kanpo geratzea; baina gaur ez naiz gustora aritu, nerbioa eta nahiko lotuta», adierazi zigun errejidarrak.

Berak baino puntu gutxiago lortu zituzten Telleria eta Olasok. Telleriak azken agurrean berak egindako saioaren laburpenean bota zuen bezala, argi zegoen gruarik ez zuela beharko puntuak eramateko. Olaso aiarrak, berriz,

hasieran antzeman zuen igandea ez zela bere eguna, «gaizki hasi naiz, zortziko nagusian hankaluz bat egin dut, gaia ere ez zen nire gustokoa. Lan polita egitea zen gaurko nire asmoa, baina hasiera horrek asko markatu dit hortik aurrera egin dudana».

Estitxu Arozenak igandean argitaratutako elkarrizketan adierazten ziguna, txapelketak ez duela mugatzen bertsolari baten maila, bete egin zen bere kasuan. «Hemendik aurrera aita animatuko dut, eta pozik gainera», adierazi zuen saioaren amaieran.

Lopategik ez zuen espero bigarren izatea

A. U. / ZUMARRAGA

Igandean Zumarragan egindako saioa ez zen maila onekoa izan. Horren adierazle da, bi lehenak alde batera utzita, ez zela bertatik atera final-aurrekoetan egongo den inor. Eta printzipioz bazeuden horretarako hautagaiak, Olaso, Telleria eta Loidisaletxe esate baterako. Baina Aritz Lopategi sailkatu zen guztien aurretik, eta Euzkitzeren atzetik. Gernikarrak saio orekatua egin zuen orokorrean, akats nabarmenik gabe.

Bera gustora zegoen saioaren amaieran, «nahiko trankil ibili naiz eta nahiko konforme geratu naiz neure saioaz. Ez nuen pentsatzen bigarren izango nintzenik, baina horrela ipini naute eta pozik nago orain», adierazi zion EGUNKARIAri saioaren amaieran.

Orain Eibar eta Bilboko final-aurrekoetan jarri beharko dituzte ahalegin guztiak: «Orain nire asmoa erridikulorik ez egitea da, zeren saio gogorak dira eta nahiko estu ibiliko naiz».

Final-aurrekoetan puntu bakar batez ez da egongo Loidisaletxe.



ari naizela

JOXERRA GARZIA

BERTSOZALE: tasuna ala keria?

Zumarragako saioan gertatua ikusirik, gaitz egiten zait bertsoaioari berari buruz idaztea. Saio kaxkarra izan baitzen, batetik, aspergarria oso. Euzkitzek nekerik batere gabe atera zuen lehen postua, berak dakien bezala esaldiak josiz, harrigarriro, baina arriskatu gabe. Gero ere izango da horretarako aukera...eta beharra. Aritz saio erregularra egin zuen, eta horixe aski izan zitzaion sailkapena segurtatzeko. Azken batean, talderik kaxkarrena gertatu zen Zumarragako, orokorrean, bi bertsolari bakarrik sailkatu baitziren.

Zergatik, orduan, halako jendetza Beloki pilotaleku apainean? Joxe Mari Gabiria lagun eta lankide ohiak albotik egin zidan komentarioa: «Hemen bazegok bertso saio batean sekula santan ikusterik usteko ez nuen herriko jendea». Bertatik ezezik, kanpotik ere jende mordo gerturatu zen Zumarragara. Mila eta bostehun lagunentzat zegoen pilotalekua egokitua. Mila eta zazpirehun sartu omen zen. Beste ehunen bat, sartu ezinik etxera itzuli omen zen. Frontoiaren teilatu hegaletako leihoetatik, berriz, gazte mordo bat egon zen

saio osoan, ez dakit oso ondo begira ala entzuten.

Pozgarri izan liteke guzti hori zenbaitentzat. Bertsozaletasuna goraka doan seinale garbia. Ez dut nik ezetzik esango. Baina ohizko bertsozale benetakoez gainerako jendea zer dela eta joan ote zen herenegun Zumarragara? Bertso giroan gozatu bat hartu asmotan, ala laurdenetako azken saioaren morboaren usainean?

Izan ere, bertsolaritzaren loraldi harrigarri honetan ere oro ez baita urre.